

prima acie non solum hortatorem, sed virtutis etiam cuiusque & strenuitatis testem. His vocibus concitatus miles ferociter pugnam conferit, tantaque strenuitate & pertinacia dimicat, ut fufis fugatisque hostibus, memorabilem sit victoriam die illo adeptus. Multi in acie cæsi, plures in fuga: Transilvanus cum omnibus fere barbaris illustribus qui ea acie dimicaverant, captus est. Capti & Italici nominis Bonifacius & Antonius Lupii, ac plerique alii Patavini illustres. Lodovici & Carrarii Principis signa in acie disiecta in Venetorum potestatem venere. Creditum est, Venetum, si hosti instare voluisset, Patavium usque cum præda & agrorum vastatione facile adequitare potuisse. Fracti ea clade cives, Carrarios incusare: in eos omnem belli culpam rejicere: odisse itaque illorum nomen ac detestari. Franciscus interim, ut aliquo incommodo Venetos afficeret, magnam equitum partem majoris pollicitatione stipendii Venetis ademit: sed hi aliquanto majorem numerum quam adeptus esset, ex Insubris accersivere, quem venientem ut exciperet, Jacobus Maurus Veronam usque progressus est; eratque cum eo Marsilius Francisci frater, qui post acceptam cladem, quum se pacis auctorem civibus obtulisset, nec fratrem in sententiam trahere posset, in illum cum multis conspirasse dicebatur. Verum reputans quantum ob id sibi a domesticis periculum immineret, ad Venetos transfugit. Marsilii exilium majorem adhuc Francisco peperit invidiam; atque ita civium odia in eum exarsere, ut nihil amplius ei domi tutius quam foris videretur. Lodovicus quoque, audita suorum clade, ac Transilvani casu, ad eum scripsit, ut de pace quibuscunque conditionibus jam cogitare inciperet: non esse, cur a se auxilia ulla speraret amplius. Fracta hostis pertinacia, pacem petiit: quam his conditionibus impetravit, ut Princeps & Patres quinque viros crearent, qui fines, de quibus ambigebatur, suo arbitrio terminarent: Quod Patavini in præsentia Veneto nomini quadraginta aureorum nummum millia, inde ad quindecim annos quatuordecim millia quotannis penderent: Quod Franci-

1372

*Transilvanus cum auxiliariis copiis victus in Venetorum potestatem venit.*

1373

*Pax Patavino reddita quibus conditionibus.*